

– COMUNICÂT STAMPE –

PLUI LENGHIS, PLUI VITE

*In ocasion de Zornade Internazionâl de Lenghe Mari la
presentazion de fotografie linguistiche realizade de rêt di scuelis di
secont grât “La Lavagne Plurilengâl”*

Tai prins mêis dal an scolastic 2019/20, passe **900** students furlans di prime superiôr a an partecipât al scandai “**La fotografie linguistiche de classe**”, un progjet metût in vore de rêt di scuelis “**La lavagne plurilengâl**” par promovi il plurilenghisim e la valorizazion des lenghis feveladis tal teritori regionâl.

A son sîs lis scuelis secundaris part de iniziative: “Bearzi” di Udin, “Linussio” di Codroip, “Magrini-Marchetti” di Glemone, “Manzini” di San Denêl, “Marinelli” di Udin, “Paschini-Linussio” di Tumieç.

Il scandai, inviât za fa cualchi an dal liceu Marinelli, al è stât inmaneât par scrutinâ cualis lenghis ch’a doprin i zovins tes diferentis situazions de lôr vite (famee, amîs, scuele) e cualis lis competencis linguisticis, orâls e scritis, ch’a doprin te comunicazion. La vore e à metût in lûs, classe par classe, no dome la ricjece linguistiche dai zovins des scuelis coinvulzudis (plui di **30** lis **lenghis** feveladis in famee), ma soredut cetant ch’a vegnin dopradis lis lenghis di minorance, come il **furlan**, il **todesc** e il **sloven**, tuteladis dal articul 6 de Costituzione taliane.

Il progjet e i dâts de “Fotografie linguistiche” a saràn presentâts **Vinars ai 21 di Fevrâr** dal 2020 al liceu **Marinelli** di Udin **a lis 3.00 dopomisdì**, in te suaze dal incuintri-dibatiment dal titul “**Plui lenghis, plui vite. Atualitât e prospetivis par une scuele plurilengâl in Friûl**”. Ae presentazion a fevelaran: il dirigjent dal Marinelli **Stefano Stefanel**; **Matteo Fogale**, dal grop di coordinament de rêt “La Lavagne Plurilengâl”; **Fabiana Fusco**, professore di Linguistiche de Universitât dal Friûl, cuntun contribût dal titul “Cui che al è monolengâl ch’al alci la man! Riflessions sul plurilenghisim e la educazion plurilengâl te scuele”; e **Linda Picco**, za ricercjadore de Universitât dal Friûl, ch’e fasarà une analisi dai dâts de Fotografie linguistiche 2019. Al sierarà l’incuintri il Diretôr dal Centri Interdipartimentâl pal Sviluf de Lenghe e de Culture dal Friûl (CIRF) **Enrico Peterlunger**.

L’incuintri si davuelç in te suaze des celebrazions pe **Zornade Internazionâl de Lenghe Mari**, inmaneade de Conference Gjenerâl de Organizazion des Nazions Unidis par la educazion, la sience e la culture (UNESCO) tal Novembar dal 1999, cul fin di promovi la diversitât linguistiche e culturâl e il plurilenghisim.

La Lavagne Plurilengâl e je une rêt di istituzions scolasticis e culturâls furlanis che si impegnin pe promozion de educazion plurilengâl e la tutele de lenghe furlane inte scuele secondarie di secont grât cuntune prospetive multicultural e europeane.

– CUN PREIERE DI DIFUSION –